

梁補闕集卷下

吳縣令廳壁記

在春秋列國各有屬邑其主者魯謂之宰楚謂之尹晉謂之大夫秦時天下始置令長宅一同之內操賞罰之柄有民人焉有社稷焉風俗成敗本予身黎元安否繫乎政其體大矣自京口南被于淞河望縣十數而吳為大國家當上元之際中夏多難衣冠南避寓于茲土叅編戶之一由是人俗舛雜號為難治加以州將有握兵按部之重邑居當水陸交馳之會承上撫下之勤征賦郵傳之繁百倍它縣夥予其中不可勝紀大曆十一年天官精選可以長民者于是范陽盧公由太原府初縣

令為之公外寬內明敬事而信政本於仁飾身以文下車三年闔境之人安土樂義而不知安樂之所從來蓋平之以和也士君子立身論道之通塞不論位之升降吳縣下畿服一等公俯而為之抑選部為官擇人而公履道從正所由然也予知公者敢錄其實書于東序以播其令聞時十四年二月甲子記

河南府倉曹參軍廳壁記

倉曹掾祿秩位次載于甲令在漢魏間與參軍事其職各異五府州及郡皆有其官北齊天保中又授參軍以繫官曹之號蓋取夫以文吏而參武事隋由之國家亦因之河南府領二十六縣為主東都環地千里邦畿之

內征賦之入凡蓄聚之物皆于其司一都之移用郡吏之稍食又出焉故其務殷其事積常為他曹劇居之者不勤則廢不廉則敗不明則耗數干沒之患生其職或擢居南宮及御史府故有司常綜其名實考其功緒然後授之伊陽張君闓鄉李君今並為其官李以貞固稱張用文敏著予謂命官之職事與二掾之才美不可以不紀遂直筆書之其兩曹位次與前政名氏端如貫珠列于記之左右

鄭縣尉廳壁記

自華而東、距洛師抗雄多臨大道其縣有七若壤接天府號因舊國今鄭為之首又斜隣其陸焉天官每銓

士補吏常屬意于此三科之選其人尤精比畿服之偏者難易相隔不啻數等其地望可知也元年春正月之後賢侯才子曰蘭陵蕭佺以貞敏恪慎再命為尉掌倉曹出納與工德修飾之事：舉職修而令名隨之暇日謂予曰之邑之作非舊也初在于州東北隅廣德中以賊臣周智先以河潼叛放暴兵換官寺且脇誘將吏生立己祠而棟宇斯崇及王師致誅牧民者從便宜而重改作乃刷滅凶慝之遺塵從二治焉是廳蓋祠之餘也嘻曩者憑而為妖今乃即而為改合于大順用鑒將來是宜書之以告昧者余于是著之屋壁且以紀夫人之美若風俗彊土與置邑之年代分于尉今監察御史黎

逢嘗編為鄭志藏於州府中可覆視也故不書時御史中丞董公為邦之三載秋九月安定梁肅記

崑山縣學記

學之制與政損益故學舉則道行政行崑山吳東鄙之縣先是縣有文宣王廟：堂之後有學室中年兵饑薦臻堂宇大壞方即縣多故：未遑繕完其後長民者或因而葺之以民尚未泰故講習之事設而不脩大曆九年太原王綱以大理司直兼縣令既而釋奠于廟退而嘆曰夫化民成俗以學為本是而不崇何政之為乃諭三老主吏整序民飾班事大啟室于廟垣之右聚五經于其間以邑人沈嗣宗躬履經學俾為博士于

是遐邇學徒或童或冠不召而至如歸市焉公聽治之暇則往敷大猷以聳之博考明德以翼之優而柔之使自求之揭而厲之使自趨之故民見德而興行于鄉黨洽于四境父篤其子兄勉其弟有不被儒服而行莫不耻焉僉曰公主于設教矯其末不墜其本易其俗不失其宜也傳曰本立而道生昔崔瑗有南陽文學志王粲有荊州文學志皆表儒訓以著不朽遂繼其流為縣學記俾來者知我邑經藝文教之所以興是歲龍集乙卯公為縣之明年也

通愛敬陂水門記

歲在戊辰揚州牧杜公命新作西門所以通水庸致人

利也冬十有二月土木之功告畢從事徵其始請刻石以為記云書載濬猷滄距川傳稱為川者決之使導然道與政損益政舉則道舉政行則道行則革則久賢哲之治也當開元以前荆江岸于揚子海潮內于邗溝過茱萸灣北至邵伯堰湯之渙之無隘滯之患其後江派南徙波不及遠河流浸惡日淤月填若歲不雨則鞠為泥塗舟楫陸沉困于牛車積臭含敗人中其氣為疾為瘵長民者時興人徒以事開鑿既費累鉅万或妨奪農功殫財竭力隨導隨塞人不寬息物不滋殖百有餘年矣貞元初公由秋官之貳出鎮茲土既下車乃驗圖考地謀新革故相川源度水勢自江東而西循蜀岡

之右得其浸田句城湖又得其浸曰愛敬陂方圓百里
支輔四集盈而不流決而可注圖以上聞帝用嘉允乃
召工徒修利舊防節以斗門驪為長源直截城隅以灌
河渠水無羨溢道不廻迂于是變濁為清澈淺為深潔
清澹澄可灌可鑑然後漕輓以興商旅以通自北自南
泰然歡康其夾浸之田旱暵得其溉霖潦得其歸化硤
薄為膏腴者不知幾千萬畝野人誦曰膾：原田自今
以始歲其豐年都人誦曰沔彼流水我邦是紀鍾美不
知嚮非我公有先物之知移俗之才則曷能運可大之
謀蠲累世之弊繇旬朔之勞致無疆之逸宜乎人之永
歎也如此按陂塘本魏廣陵守陳登所設時人愛其功

而敬其事故以名之謝文靖成堰又以召公之德為稱
有魏以還伍百餘載不朽之績及公而三皆在斯邦不
其盛歎水門之作將以重成功示長利非登臨游宴之
為嘻後之人抑可以知

鹽池記

黃河自崑崙山東會溟漲九折廻互監泉各一儒者書
以為海目則卯瑕氏之地瀆流其長觀乎北浴陵阜南
瀕山巖湛：烟碧浩無春冬蒸騰雲霓出入日月亦云
廣矣雖吞喻坳隧代增淳鹵而利倍農穡有殷家邦賢
惟從山湧不加海交兩都之軌遠延万貫之資貸是人
不厭也當武后聖政務述省方鳴鑿載臨流潦旋敗洎

皇明道發澤漸殊垠天之既啟鹽乃旋復非夫蟠蚪神
應坤次靈子亦曷能旌昏明籌負勝矣帝所宜念貴然
來思今天牧以涖擇藩佐而貳賢能解墜于事則亂
字通閉閤扼拓磯之左隅鄰大邑之東部崇府庫歲望
子儲蓄樞管鍵夕俟子閉蔽茲乃慮終于始也邦貴康
食戒之克勤人非忘勞道在悅使大命日下巡功歲移
廣岸砥平而可礪脩畦綺兮以如織是時也春光奪炎
氣興洪波浚白波騰或瀟或汨以評以瀚狀雲洩而雨
駭或花明而雪凝京坻蘊崇豆區嘉量隸戶徵筭鹽人
揭書民無不供先薄稅以從賦君孰与足逮黎庶而必
分固非擅權利貴貨易土登陸而雷軒流日驟水而雲

艦擊星律有變給用無絕傳曰山澤林鹽國之寶也茲
其是焉若周物揆情易人推類施之求報大道之玄德
也明則啟祚聖人之知變也降人納汙明君之蔽垢也
羹餼調膳賢人之入用也包四美而世濟資百工而國
貞將以樹善永年非石無以紀垂裕裔胄非文無以揚
則我晉寶遠于万方也

李晉陵茅亭記

趙郡李充仲山大曆中由秘書郎為晉陵令思所以退
食修政思所以克己崇儉乃作茅亭于正寢之北偏功
甚易制甚朴大足以布函丈之席稅履而躋賓位者適
容數人則仲山約身臨人顛固簡一之道可知矣解龜

後繼其任凡六七人每居于斯必稱作者之美而仲山
安貧養性寓于舊邑者十有二年方收知之又檄而攝
焉仲山清德之嗣孝于家勤于官其揖也念前之非久
政之未成也乃必躬必親必誠必信順思不懈而衆務
咸集未有及者必訪問咨度擇善而從之則其治足徵
也君子謂仲山居處恭執事敬出入一紀再臨斯人有
以見位不苟進仕不苟行大來必俟時於是予始笑予
曩睹亭之起今又觀進德之美輒直筆志之謂之晉陵
茅亭記時貞元二年夏五月

京兆府司錄西廳盧氏世官記

御史中執法范陽盧公用直清之德掌中邦憲恭睦之

道用宏家法嘗謂其屬監察御史梁肅曰我王父廣陽
公以明德懿識嚮用休福羽儀于中朝我伯父嗣公以
文學政事載揚茂烈光績于前人皆肇久史職登于京
兆紀綱之任洎予之季曰侶亦能恪慎不懈踐修其官
繼處于解之右堂惟二代徽在茲侶也允迪在茲吾子
嘗號史臣宜存于篇以示後裔肅辭不得命以為在昔
司馬氏世序天地鄭武莊世為鄉士宋魚氏之左師晉
籍父之司典下洎子樂之制氏曆之疇人俱以傳業彰
予舊史故傳稱善守先代雅詠維其有之雖大細不倫
職事或異其纂修一也惟京之大惟兆之衆天子之都
四方之極糾而轄之是稱司錄其地劇其選精嘗與殿

中蘭臺南宮即位旋相出入初廣陽公諱齊卿由司倉掾為之驟登郎官更貳本府布澤于彭滑幽徐之人端護春宮崇贈少保開元初嗣公諱成務罷錄歧下軍事實居其任其後作牧于壽于杭于濮于洺于魏繼受玄社以處太原咸有嘉績歲在冊府今戶部郎侃始遠哲聯事之嫌詔解柱後惠文以就斯職中丞之拜也又有臺府臨察之避在官之屬其為人簡而廉文而不害在選部辨論三登試言第考茲任也詳敏稱一時之最薦紳先生評天下之事謂如廣陽之家風施于子孫中丞之仁德至于兄弟斯盡美矣若三世居一官同一署通以全德物于當時又難能也噫古人所稱方斯其類乎

爾小子拜命著紀書于本廳之東序用闡夫廣陽之宗且為名臣世官之表時貞元庚午閏四月記

常州建安寺止觀院記

沙門釋法顯啟精廬于建安寺西北隅与比丘衆勸請天台湛然太師轉法輪于其間尊天台之道以導後學故署其堂曰止觀初南嶽祖師受于惠文禪師以授智者大師於是予有止觀法門大旨止謂之定觀謂之惠演是二法攝持万行自凡夫妄想訖諸佛智地以契經微言括其源流正其所歸圖解然後能圓修圓修然後能圓證此其畧也自智者五葉傳至今大師當像法之中誕敷其教使在家之徒捨邪反正如大雲降雨無草

木不潤升其堂者甚衆其後進入室不十數人法顯與
居一焉予以為法門有三觀遂徵之此堂蓋非緣不成
空也有之以為利假也不廣不狹不奢不陋中也又以
淨名之喻宮室謂于虛空然不能成隨其心淨則一切
境靜作一物而觀者獲數善焉又况我大師居之為斯
人之庇乎小子忝遊師門故不敢不志時大曆九年冬
十一月日記

祇園寺淨土院志

祇園精舍淨土院者沙門常輝觀佛三昧之所也按契
經西方極樂界曰有佛曰無量壽如來誕敷本願爰宅
彼土垂拱東向以提群生如想念者利有攸往而至

者住不退地至矣哉蓋出世之康衢三乘之舟楫也原
夫真俗同體聖凡一貫隨心升降見境差別於是深靜
相形依正相成離為百喻合成一念如來以其然也故
因其所習視其所安隨所感化示所依處無量壽國蓋
所示之一歎有若觀心佛二者不來不往誰縛誰解如
是觀者生之上也如是如見二字無信解觀念漸純生之
次也繫緣事厭染懷淨又其次也或近或遠或真或
假值佛聞法同歸一地此西方教所以為至也或者以
為法有相空不可得生彼界者与斯土何以異是不知
佛意遠矣輝既修此道場懼昧者不知所以然因命我
紀之

漢高士嚴君釣臺碑

先生諱光字子陵會稽餘姚人也君闡于漢光武之世東觀書實載其事當哀平之後天地既開先生韜其光隱而不見建武反正雲雷既定先生全其道而不屈消息治亂之際卷舒夷曠之域如雲出于山游于天復歸于無間不可得而累也則激清風聳高節以遺後世先生之道可見于是矣或曰人倫大統莫大乎君臣崇德致用莫盛乎富貴而子陵以賤為貴以臣傲君二者其失于教歟君子曰不然夫賢哲之道一動一靜動而用者功濟于當世靜而不用者化光于無窮故許由于堯先生于漢皆不易于世游方之外俾後之人聞清風而嚮慕焉蓋運有會事有行伊呂遇湯武而立大功子陵遇世祖而立大名去就不同歸于道焉歲在大梁予涉江自富春而南訪先生遺塵則釣臺尚存仰聆德風刻頌于石其文曰

季葉浩漑風蕩淳先生括囊鳥獸同群四海既平故人為君富貴于我有如浮雲呂至禁中告歸江濱下視天子上動星文接輿肆狂孤竹求仁介推山死龔勝蘭林猗与先生異乎斯人俯仰世道從容屈伸清溪悠白石磷磷遺風是仰終古不泯

天台智者大師碑 并序

天台山西南隅一峯曰佛隴蓋智者大師得道之所前

大佛教重光之地陳朝崇之置寺曰脩禪及隋創國清廢脩禪號為道場自大師入滅一百八十餘載長老
大比丘然公光昭大師之遺訓以啟後學門人安定梁肅間上易名銘勒大師之遺烈以示後世云大師諱智顓字德安時號智者其先潁川陳氏世居荊州之華容感緣應迹載在別傳夫治世之經非仲尼則三王四代之制寢而不彰出世之道非大師則三乘四教之旨晦而不明昔如來乘一大事因緣菩薩以普門示現自華嚴肇開至双林高會無小無大同歸于佛界及大雄示滅學路派別世既下衰教亦陵遲故龍樹大士病之乃用權略制諸外道乃詮智度發明宗極微言東流我惠

文禪師得之由文字中入不二法門以授南嶽思大師當時教尚簡寂不能廣被而空有諸宗扇惑方夏及大師受之于是開止觀法門其教大略即身心而指定慧即言說而詮解脫大中一實相之宗趣無證真得之妙自發心至于成道行位昭明無相奪倫然後誕敷契經而會同之渙然氷釋示佛知見窺其教者修焉息焉蓋無入而不自得焉大師之設教也如此若夫弛張用舍開闔嘿語高步海內為兩朝宗師大明在天光被四表大雲注雨旁施万物繇是言佛法者以天台為司南殊塗異論往々退息緣離化城示滅諸山是歲隋開皇十七年也夫名者實之賓教者道之門大師涵其賓闡其

門自言地位示有證入故感而應之。事可得而知也。若安住法界現為比丘等覺歎妙覺歎不可得而知也。當是時也得大師之門者千數得深心者三十有二人。纂其言行于後世者曰章安禪師灌頂。傳縉雲威禪師威傳東陽東陽縉雲同號時謂小威。傳左谿朗禪師自縉雲至左谿以玄珠相付向晦宴息而已左谿門人之上首今湛然禪師行高識遠超悟辯達凡祖師之教在章句者必引而伸之後來資之以崇德辨惑不可悉數蓋嘗謂肅曰是山之佛隴亦鄒魯之洙泗妙法之耿光先師之遺塵爰集于茲自上元寶曆之世却寇擾攘緇錫駭散可易名建寺修持塔廟莊嚴佛土迴向之

徒有所依歸繫衆人是賴汝吾徒也。蓋紀諸文言刻于金石俾千載之下知吾道之所以然。小子稽首受命故大師之本迹教門之經明後裔之住持皆見乎辭其文曰

諸佛出世惟一大事天台教源与佛同致赫々大師開示奧秘載弘道要安住圓位白日丽天。下文明大師出現國土化成無生而生。化兩明薪盡火滅山空道行五世之後間生上德微言在茲德音允塞明。我后易名淨域此山有壞此教不極

越州開元寺律和尚塔碑銘 并序

釋氏先律師諱曇一字曇亂報年八十僧夏六十一以

大曆六年十二月七日減度于越州開元寺遷坐起塔
于秦望山之陽制衰會葬者以千百數大師本南陽張
氏曾祖隋太常恒始家會稽之山陰大師誕鍾粹氣聰
悟夙發幼學五經因探禹穴至雲門寺遂依沙門諒公
出家景隆中剃度尋受具戒天縱辯慧益之以軌儀翁
然已為人望矣開元中西遊長安觀音亮律師見而奇
之授以毗尼之學又依崇聖寺檀子法師學俱舍唯識
從印度沙門善無畏受菩薩戒探道觀奧出類拔萃暮
月之間名動京師大師崖岸峻峙机神坦邁體識詳雅
應用虛明得三藏之隱蹟究諸宗之源底加以素解玄
儒苟綜曆緯長老聞風而悅服公御下榻以賓禮由是

与少保交國陸公象先賀賓客知章李北海邕徐中書
安貞褚諫議庭誨及涇縣令萬齊融為儒釋之遊莫逆
之友其尊世皆先之以文行弘之以戒定入蘭室而馨
香自發臨水鏡而毫髮必鑑不知其所由然矣開元二
十六年復歸會稽謂人曰三世佛法戒為根本之不一
修道遠乎哉故設教以尸羅為主取鄴郡律疏合終南
事鈔括其異同詳發正義學徒賴焉大凡北際河朔南
越荆閩四分之宗自我而盛列炬之破昏黑群流之赴
淵澤適來之時行化也如彼有為而生乘化而息草木
潛潤慈雲無心適去之時處順也如此人世遷轉道存
運在瞻望不見寂寥空山哀哉銘曰

越水漫。崇山廻合。大師化滅。武建靈塔。緬慕上士。誕
修淨法。有威有儀。不穿不雜。德溥化洽。雲從海納。勒銘
垂後。千萬億劫。

梁高士碣

有漢高士梁君伯鸞。諱鴻。扶風人。君得天元純。誕其生
知囊括道妙。而游于世。遭漢微缺。澆風偃物。君以為道
不可以徇時。故安節以高蹈。高蹈不可以激俗。故登印
以作歌。作歌不可以遺患。故適越以遐遊。遐遊不可以
不粒。故寄食于杵臼。是以孟氏悅其道。而妻之。伯通尚
其風。而禮之。安夫大而遺其細。忽夫語而順乎默。樂則
行之。憂則違之。斯可謂高世之逸民矣。原夫天之運也。

曰明与晦人之道也。曰否与泰達人知否与晦之不可
為也。故耦而耕。狂而歌。鑿坏以逃。荷蓑以游。而晦德避
難。不成乎名於戲。伯鸞非斯人之徒。則誰与哉。唐大曆
六年。小子旅于吳。得君之舊遊焉。孟子曰。聞柳下惠之
風者。鄙夫寬。薄夫敦。然則聞君之風聲。亦將舍爾朵。願
以觀我靈龜乎。乃刊貞石。以識遺烈。銘曰。
山隱器車。河出馬圖。伯鸞不行。獨与道俱。太虛無際。浮
雲無繫。伯鸞伊何。冥迹人世。直道辱身。三黜魯邦。扣馬
逆諫。餞于首陽。邀矣伯鸞。靜而含光。作銘皋橋。万古是
望。

外王父贈秘書少監東平呂公神道表銘

公之先出自姜姓太公之亂唐虞之際佐治洪水有功以能為禹股肱心膂命曰有呂氏洎太公誓蒼雉平商牧桓公責包茅匡周道傳國七百列于春秋漢興以勲戚在侯服者二十人臨泗侯之孫通封于東平其後國除為郡著族元魏末有汝陽公思禮者扶翼周文開霸關右歷行臺右丞兵部尚書時魏分為西東中夏擁隔遂居于河東今為蒲人也從尚書四葉生璉皇朝晉陽令贈柳州刺史柳州之嗣曰仁誨以文學稱以從父兄太一俱用射策科太一歷御史尚書郎中書舍人戶部侍郎右庶子仁誨由成王文學轉岐王府屬累遷右庶子金吾中郎將資州刺史除許州未拜而薨以孝行聞

仕至太僕丞加朝散大夫太僕生公諱某字某少淳茂有至行居太僕府君憂泣血三年鄉黨稱之制終治古文尚書左氏春秋二十舉孝廉補博昌主簿歷任營丘文安二丞宣勞使以清白薦試守泲水令公為政務仁恕去苛察密化窮流邑中移風再歲正除加朝散大夫公性簡退不以善自名且不染為吏秩未滿移疾罷去居于濟源王屋山之陽嘗言君子之道不從俗不離群勿安抗迹而傲世慈明濡足以救民曷若中行以全吾貞由是逍遙樂道以漆園鶻冠之言為師時閱歷代史究興敗治亂之端叅以立身行道之義著書十餘卷號續呂氏春秋草藁未就屬寢疾捐館享年若干時聞

元二十五年也永泰中嗣子某位朝散大夫右贊善兼
陳州刺史尋遷檢校秘書少監兼徐州別駕因詣闕拜
章乞迴所授賜命于先人詔追贈公太子中允謝恩之
際又以公所著書上聞遂改贈秘書少監後十有三載
歲在其辰某月日龜著襲吉始安宅于某鄉里之原江
夏郡夫人黃氏祔焉夫人漢太尉琬之裔孫皇朝大將
軍淮州都督號國公君漢之孫沂王府長史號國公承
源之女洪州刺史京兆韋同之甥有溫仁孝愛之德勸
義垂訓之美後公七歲而終公之追命于是有江夏之
贈嗣子秘書痛先君先夫人厭世寢遠音徽將昧常欲
立貞石傳德風蓄誠未申先是祖謝小子再拜受命于

太夫人且成伯舅之志恭論外祖之烈以示後嗣楊惲
傳太史之書久慚庸陋韓康感中軍之愛空想生平道
在茲子以表墓文曰

赫々有呂肇發于姜既協大禹亦亮武王營丘門地東
平傳嗣書之勲冊有焯名物中郎伯仲允迪斯貴寔生
秘書含道蘊粹仁為己任孝亦天至論經八覽文叅六
義三邑之佐清恭廉貞鳴絃作宰休有清聲退謀于道
爰誨其明體順保和遺榮入冥春闈中允蓬山二職運
往時來退榮隱德振彼江夏光敷內則不及象服空垂
燕翼太行之右清濟之北外孫紀辭以志兆域

睦王墓誌銘

王諱某有唐代宗睿文孝武皇帝之第幾子今皇帝之
愛弟也某年封睦王春秋若干以貞元七年某月某日
薨于京師皇帝震悼命有司筮宅兆選吉日以明年二
月某辰葬王于某縣某鄉某原禮也惟天祐序于皇家
惟王承慶于祖宗方于有周康叔實文王之子擬諸炎
漢河間稱武帝之弟天鍾秀氣幼挺全德清明在中淳
耀發外稟先聖之嚴訓則樂善不倦奉吾王之深愛則
敬順日躋至乃因心之孝率性之道溫良惠和敏爾端
懿學無不探藝無不至固以逸焉殊倫焯於生知者已
洎夫俯物典策啟土建封桓珪之重盤石之宗守以清
淨行以謙冲不然者何名之茂何寵之豐方將明上壽

以用五福胡乃天不憖而命不融此聖人所以深津門
之慟凡伯所以惜東平之終臣肅奉詔銘石真玄壤之
中所以紀茲墳之永固以表王德于無窮者也銘曰
聖帝介弟於維睦王令問令望于邦有光惟王之賢懿
德日宣受福于天胡不永年東門之路西靡之樹乃有
千古賢王之墓

給事中劉公墓誌

公姓劉氏諱迴彭城人楚元王交之後也當漢興諸侯
王子孫惟楚為盛世為儒宗光耀史課以至公大父皇
朝尚書比部郎中贈徐州刺史府君諱藏器徐州生烈
考右散騎常侍贈工部尚書居巢文公諱子玄初文公

儒為天下表有才子六人曰臧曰鮒繼文公典司國史
時議比子長孟堅曰秩曰迅以述作之盛德行之美追
踪孔門曰彙與公用剛直明毅焯於當時故言卿族者
舉盛業以明其家公好學善屬文天寶中進士登科解
褐拜江都尉轉左金吾兵曹介江南西道採訪使歷大
理評事監察御史入為殿中侍御史出為永州刺史未
行政戶部員外郎尋佐江淮轉運使授著作郎加檢校
戶部郎中國子司業三領侍御史當是時中夏初定而
兵未戢故公所受任以餽運財賦為先而公亦飾躬泣
職所到無不均不安之患大曆初詔擇二千石遂授公
吉州刺史三載績成徵拜諫議大夫遷給事中移疾請

醫于洛陽享年若干以建中元年七月某日終于某里
私第嗣子某泣血孺慕以某月日奉公之喪權窆于某
原惟公貞方端爾居敬行簡和而不同直而不倨博聞
強志樂善下人在諫司陳古今以通諷諭言發而王度
潛潤事行而天下莫聞及夫給事黃門釐舉典要壺遂
之才未展士安之病已深吾道豈窮大運斯止嗚呼如
公祭酒秩功曹迅並與故相國房公瑄厚善其終也趙
郡李公華志焉洎公在廬陵治行尤異則故相國崔公
祐甫頌焉益伯仲德美煥乎金石試為斯文銘曰
惟堯之緒在漢開楚導長源兮比部蘊仁文公允文闢
儒門兮重世掌史遷固慙美立斯言兮惟公才明劉中

志行直道發兮累佐史臣一麾牧人遺愛結兮給事于
中遭命不融神理忽兮丘有夷淵有實舟斯失劍斯沒
石不滅兮

侍御史攝御史中丞贈尚書戶部侍郎李公墓

誌

公諱史魚字某趙郡平棘人也隋大邑令大經玄孫皇
朝襄州錄事參軍玄暉曾孫漣水丞藻之孫青州司法
參軍贈和州刺史萬惣之子其先于木藩魏武安霸趙
司隸盛于東京特書別為西祖載在紀諫于家有先自
下邑至和州四世無違克生俊德公天姿俊邁少負英
氣清明博厚虛受特達行本于孝友業成于文章開元

中以多才應詔解褐授秘書省正字時海內和平士有
不由文學而進談者所恥公以盛名冠甲科群輩仰之
如鴻鵠軒在霄際矣秩滿調補河南叅軍長安尉監察
御史時宰相李林甫當國怙權稍粗去異已者公外不
附離內不懼憚竟為所陰中貶未揚丞累移至朝邑令
下車周月而頌聲作上方銳意武功寵厚邊將拜公殿
中侍御史參安祿山范陽軍事河北首亂公脅在圍中
危冠正髻諫讓元惡勢迫難奪望重見容朝廷雅知公
忠遷御侍史充封常清幽州行軍司馬隔于凶盜詔不
下達公與張休獨孤問俗密結壯俠志圖博浪之舉間
遣表章請固河潼之守帝用深嘆吾謀未行會虜將能

人姓元皓擁師河上公詭請勞撫因以大義諭之能亦知復翻然向順裂賊左臂繫公之力是歲至德二年也相國張平原鎬以狀聞復授侍御史攝御史中丞充河南節度參謀河北招諭使中朝方倚公以重任戎鎮又咨公以成務公謂委身蹈難非節違亂歸正非公叨恩受祿非義佞勉從政吾何以安假公事東至江淮以上元二年七月二十六日遇疾終于揚州官舍春秋五十六藁葬于禪智佛寺之側貞元三年嗣子竦以谷口扈從之勲朝廷推恩追贈公尚書戶部侍郎五年歲次丁巳某月日始歸窆于某鄉某原上距捐館凡二十有九年不得吉卜且難是以緩夫人河東郡君裴氏河州刺

史某之女吏部尚書寬之姪以禮佐君子降年不永春秋若干天寶二載終于洛陽至是祔焉傳稱有明德若不當世其後必有達人惟公含章挺生好是正直蹈難全德終然允臧蓋道与其仁神輔其志宜乎其有後也竦以文藝吏事歷中書舍人戶部侍郎天子以為才任方鎮加左散騎常侍知鄂州軍州事領都團練觀察使長才厚位而壽不至士友痛之竦弟竦長安尉亦早卒最少曰竦純懿而文克奉家業咨于從祖父殿中侍御史臯魚爰卜兆域以寧神宅臯魚于公天倫之間有知己之道泣叙美行俾予志之其文曰時之晏卿雲爛鸞鳳于飛上清漢吾道行年路方半時

之昏沴氣繁鯨鯢蕩海橫中原側身西望不敢言忠莫
渝兮計獨存奮詞感激收東藩雷雨作解草木蕃一隨
逝水空游魂播清徽与茂烈永延輝兮垂後昆

房正字墓銘

河南房諱雲字敬叔者唐長安令思晦之孫殷城令
齊金之子相國贈太尉清河公瑄之族子也興元二年
十月終于鹽官縣之旅次旋窆于楚州寶應之某原孟
子云雖有鑑基不如逢時楊雄亦稱李仲元不誣其志
不累其身時無仲尼惡乎聞若敬叔以五常為師六學
為友行年五十八而動不一合艱屯艱脆沒于道路噫
孟軻揚雲其知言者歟敬叔十歲好學十五年能屬文

二十餘值陸渾為戎遊于東南劉僕射以賢良薦授祕
書省正字常黃門崔中書繼持國柄方待以儒者之職
屬二相薨免其他時政當一作路君又不能附離乃卷道退
歸每言五經之首其道大備而去聖窮遠義類繁滋博
而寡要學者罕究乃撮其異同各以彙聚凡三百餘篇
草藁未就遘疾而歿再耕廢疾申公昏靡世道下衰仁
人隨之然欬通人趙郡李遐叔常云我思古之人房行
古之道房哉房哉哀哉哀哉嗣子某泣序遺烈請予為
誌文曰

儒為德本德寔教源不有達學孰纂群言恂二房君行
直而溫一匡六藝獨立顯門宜登師席啟廸蒙昏今也

則亡來者何云荆棘滋茂芝蘭燒焚命不可問吁嗟房
君

明州刺史李公墓誌銘

大曆七年冬十月甲子前明州刺史李公寢疾終于晉
陵之無錫私館嗚呼公諱長字某隴西狄道人其先自
涼武昭王玄盛七葉至皇朝工部侍郎岐州刺史義琛
生吏部郎中綰生蔡州長史贈宋州刺史某生公
公生而聰明治左氏春秋舉孝廉初任貝州參軍三遷
至國子主簿御史中丞盧奕司察旬服辟為從事天寶
十五年大盜覆東周奕死節公遁脫而南會永王璘都
督江左諸軍雅知公材將署于幕以畫公告不能無何

璘果敗君子以公為知幾時肅宗在岐朝廷擢良吏以
慰郡縣不限官次多即授印綬丞相常見素表公可用
牧民詔攝安州刺史考績既成真拜均州治中遷鄧州
康允之叛南土大擾公會諸將以王命討不臣尺兵不
喪凶黨大壞寇節之間民到于今受其賜上方勤恤下
民重二千石之任不暇登公于朝由是歷隋曹婺三州
三州輯寧徵傳韓王德既宣出為梓州又換明州時
越初靜瘡痍未復公務穡勸分人安懷之及其去也如
奪乳育嗚呼公凡歷官一十有四其剖符分憂者八享
年七十其為人也剛毅寬明惠和而清所至之和先以
禮後以刑使人遷善遠罪而不知其止君子曰古之良

吏也初公無胤子命兄子某為後八年十月某奉公之
喪反葬于河南萬安山之陽夫人博陵崔氏秦州掾孝
之女既筭而歸于戎以宣慈恭順享年五十先公而歿
公為明州之二年以夫人之喪反葬萬安至是祔焉禮
也夫惟天地之道可久若陵谷則無不遷也遂銘曰
於惟公先實曰庭堅作舜五臣為唐八元周道不行伯
陽西遷晉失其政涼興勃焉武昭之孫宋州之子如圭
如璧如松如梓爰在下位令聞疊二帝曰休哉命牧南
鄙在鄧有亂惟我行師寇戎既夷剖符于隨曹無罷人
發有去思或傳或蕃受命咸宜爰自東南薄言旋歸謂
天聰明胡不勅遺節彼萬安松柏凡二孺欣齊姜同穴

其間橫峙維崧翦流洛川銘勒金石永昭億年

虔州刺史李公墓誌銘

公姓李氏諱某隴西成紀人也字曰公受其先在晉霸
西涼在魏侯姑臧長發有先乃熾而昌五代生秦王府
戶曹贈太師舍人某以恭德垂裕實公之大父水部郎
中眉州刺史某以宏材廣化實公之烈考禮部尚書襄
陽席豫以大名謚文實公之外祖公生而聰邁十六以
黃老學一舉登第十八典校弘文二十餘以金吾掾假
法冠為孟侯暉湖南從事給事中賀若察宣慰南方請
公為僚佐其後宰東陽宣城二縣辟宣歙浙東二府
主崔侯昭咨以小大之政由監察轉殿中侍御史建中

初朝廷釐飭百度高選尚書諸曹郎拜公金部員外郎
選吏部張鎬節制大梁請公為介授檢校吏部郎中兼
侍御史使輟遂退耕灑洛之間起家除陝州刺史換處
州刺史累陞至朝散大夫爵隴西縣男既授代家于鄴
陽享年四十有八以某年月日遘疾捐館夫人武城縣
君清河崔氏生一女未幾公母弟曰丹有季方之賢茹
哀問卜以某年月日奉輜車歸葬于洛陽某鄉原禮也
嗚呼當漢道之盛賈誼董生桓譚馮衍皆以高才鉅名
或位淪下國或廢落田里夫豈不遭明時不識明主哉
蓋運有通躓事有離合不可以一理言也惟公有存友
仁謙之德文學政事之美卓立不羈之才竟委蓬半塗

僻典荒服且乏鄧攸之嗣而終管輅之年時歎命歎可
為慟哭者已始公之孤喪過予哀丁內艱也東陽之人
飲公惠憫公荼毒行泣賜祭既除而止奉歸宗之姑惟
敬与愛

越州長史李公墓誌銘

大曆己未八月癸丑故尚書比部郎中渤海李公卒享
年六十二月某日權窆于某鄉原嗚呼公諱鋒字公穎
齊人也其先自後魏幽州刺史高城公雄四世至皇朝
太常博士善信善信之孫曰文素以 章知名舉秀才
歷伊闕尉文素生勝尉于馮翊之白水蓋公之父也鳳
閣侍郎平章事武功公蘇味道其外祖也公器宇魁異

風神明邁中立不回旁通多可初不以祿仕為意用朋
酒自娛游江湖間交必一時之選言必可大之業相國
張平原錫之鎮江西也聞而器之表為協律郎兼上饒
令公用仁愛恤惻獨剛明肅豪右不及一年上饒之人
如熟遇濯亦既報政彭城公劉尚書晏以狀聞詔遷晉
陵令為治加上饒一等郡守李公栢筠尤重之待以賓
禮時公以發劓之器連宰二邑征鎮者矜其休風方招
佇不暇陳宣州少游表言其能授監察御史參宣歙軍
事、無苛隱遷殿中侍御史換工部郎中從事部無闕
政因條奏至京師當國者偉公之材將寘于朝公辭未
復命遂以侍御史旋介本使東遷于會稽与公俱東永

泰末妖賊殺郡將以叛其帥敗亡賊黨詐服公以單騎
往安其民一旦收隱隱三十人殺之以徇三衢之人道
路相慶人到于今稱之無何有比部之拜乃兼越州長
史既罷歸休于無錫私第道有所不通公淡然自居其
志愈厲加以率性孝弟睦親接士財必令人衣無常主
和樂扇于閨門信讓達于家邦其進也致身以從改其
退也卷懷以自收其亡也知与不知皆為歎息嚮非懿
識全才其風可懷則曷以臻此予忝從公游也久故錄
其實以紀之因用表墓誌銘曰

宜處貴德宜受福允矣比部曷其不淑融二和風
曠度踈通且仁柔惠有裕登車持斧厥績方茂力命

陽已冠闕川不駐廣廈摧構夜臺陰何日復
晝

舒州望江縣丞盧公墓誌銘

范陽盧君諱某字某漢侍中尚書植之裔孫北齊民部
侍郎范伯士嬰之玄孫上蔡令彞倫之孫沁陽令某之
季子其令德甲族上矣君孝養于內不懈于外禮極于
上不遺乎下得太和之正性蘊明哲之茂器學以聚之
問以辨之百行之一以貫之干祿代耕非近榮也安
卑從政非離群也弱冠舉孝廉授舒州望江縣丞夫道
德繫乎已窮達繫乎時惟天生德于君而止諸下位卑
道消乎當世噫造物者不其惑歟享年四十有四天寶

元年月日終于尉氏私館是歲權定于潁川之許昌里
大曆七年月日胤子太常寺協律郎東美初奉嚴訓以
公之喪後祔先大夫于陽翟之某原禮也夫默而成之
存乎德紀德音者存乎詞銘曰

顯允君子克廣德心邈乎其高淵乎其深雲藏于山風
隱于林時雨下降不聞其音性含元化形隨逝水天何
言哉命也已矣山川有變兮令聞不已

鄭州新鄭縣尉安定皇甫君墓誌銘

君諱某字某皇朝監察御史某之曾孫贈兵部侍郎某
之孫唐州長史某之第三子尚書左丞僉之愛弟歷葉
聚社左丞又嗣以淳德義之門宜有仁人君生而冲

茂聰悟孝敬弱冠以明經登科始長安丞又轉新鄭尉
性恬曠不甚以祿仕為意避亂至江南以墳籍自娛謂
論語二十篇有夫子微言故嘗既其章句以導情性非
至德要道未嘗經懷老氏不居其華孟軻言必仁義君
子志也晚節多病享年七十七以興元二年正月三日
啟手且于嘉興縣私第夫人博陵崔氏生一子曰攸號
慕哀敬禮無違者左丞嗣子兵部郎中政賓營護喪事
以前月三日權厝于某鄉原不克反葬難故也即中子
予有鄉黨之舊泣書美行見命誌之銘曰
溫良恭儉德之柄兮居常待終天之命兮卜葬從權變
之正兮

恒州真定縣尉獨孤君墓誌銘

君諱正河南洛陽人皇朝光祿大夫河南公諱義順之
玄孫故殿中侍御史潁川郡長史贈秘書監府君謀某
之少子故常州刺史府君諱某之愛弟春秋四十六大
曆十一年某月日卒于晉陵郡明年某月日歸葬于洛
陽南先塋元兄水部員外郎兼侍御史汜衙天倫之痛
且懼陵谷之不可常也于是昭銘景行誌其墓曰君之
先出自劉氏漢世祖之裔有進伯者北征以師敗績降
匈奴因部易姓其後有永公羅辰臨川王永業魏齊二
代開國承家臨川生開府儀同三司武安公子佳洛南
之福也歷代之崇業茂勳其餘祉于是有秘書之遺直

常州之茂德：美休裕叢滋于君；溫恭淑和孝友慈仁居處進退非禮不動嘗謂學者義之府文者質之薄故娛心典墳簡棄詞藝又謂干祿者躁之幾藏密者靜之奧故反情樂道易修業少時解褐授真定尉非其所好棄官不之晚節尚黃老慕禪味索籥心懷夢幻生死端居一室澹如也逮疾病或勸之藥石曰命之不可奈何雖有藥石將焉所施言未絕口嗒焉順化未婚無子知者痛之嗚呼予嘗窺天人而考性命夭壽之數福極之源蓋昏嘿而不可究已以獨孤君蘊純粹之質蹈淵騫之行而生不躋艾服慶不植後嗣彼造物者以三壽百福与何人哉先是君李氏之姊捐館其明年四月常

州府君薨反葬之日三喪俱引故親舊惋痛為善者相吊水部之哀又其可既子肅常辱常州之眷又与真定游故脩其實錄刊于貞石銘曰
顯允君子德心廣兮与道為徒以蒙養兮桑扈反真泊然往兮刻石九原畢天壤兮

鄭處士墓誌

歲在戊午六月戊子處士滎陽鄭君卒于常州福業寺庚寅權窆于某鄉原嗚呼處士之為人也入則孝出則悌直而不犯柔而不怙好讀周易及太史公書嘗遊南巢作吊夏桀文其辭甚典足見其質向使天假之壽与之祿則其道可熾坎懷世故行年三十三而夭哀哉處

士諱稷故酸惠令其之孫今黃岩令李江之子故吏部
侍郎贈左僕射齊公澣之外孫也合內外之休德成中
和之茂行使夫生不得其辰沒不見其親託遺骸于他
土顧稚子而未識痛矣夫斯命也於是書日以誌卒葬
且懼年紀起忽故月而日之

隴西李君墓誌

君諱倬姓李氏隴西成紀人涼武昭王玄盛之後曾祖
順皇朝太子洗馬生大父元恭開元中以文學政事
歷大理卿判尚書吏部侍郎生烈考訥官在太府寺丞
君承家休緒少有令聞孝敬仁順弘毅貞亮非禮不言
見善必行：有餘力則寧思六經揭厲百氏是故淳秀

之氣播為文章發於事業難于進易于退道不苟行位
不虛受常州刺史獨孤公之臨舒城聞而悅之辟為從
事府遷于常州君亦至焉獨孤公文德為天下望君入
則從容討論出則勤慮政事議者以君建大名致厚位
必自此始不幸短命享年若干以大曆十二年春三月
甲子寢疾而沒嗚呼天与之才天与之器不与之壽不
與之位天何言哉君娶范陽盧韶女一子越在襁褓哭
泣無子其仲兄武進尉迅銜天倫之哀謀及卜筮以是
月既望抱其孤送君之喪權窆于正勤佛寺之北原時
不利不克反葬故也友人安定梁肅紀其終始德善著
于石俾來者有以知君子之墓云

著作郎贈秘書少監權公夫人李氏墓誌

成紀李氏自涼武昭王以後，喬熾大在元魏有若司空文穆公冲，生司徒高陽公休績，諸父兄各登三司崇勲，盛烈載在前史。夫人司空之後也。曾祖允義，皇朝慶州刺史。大父仲進，宣州司士。參軍考備，冀州司倉。夫懸圃崑山，是生瓊璫德懿，盛族宜有賢淑。二椽葆儒行，不躋貴仕，故儲慶發和鍾于夫人。夫人幼而孝恭，長而柔明，歸于他室，克協休德。所奉之主，則著作郎天水權公其人。公大節大名，達于家邦，人倫仰為師表。夫人明識茂行，光于閨門。姻族資其訓，適有子德輿，七歲而孤。夫人茹未亡之哀，躬從宅之教，故德輿也。十五文章知

名二十，典秘書。貞元二年，以廷尉評攝監察御史，為江西從事。夫人從子南征，寓于鍾陵，其樂以道，其養以祿。一慈一孝，宜壽宜福。天實不弔，享年若干。以四年秋七月某辰，寢疾而終。德輿窮慕，崩迫忍哀，問卜號奉，輜茀至于丹徒。以來歲某月日，權合衾于先君，假葬之域。嗚呼！有行可尊，有禮可法。始輔君子，終垂母儀。而不登上壽，不介丕祉，斯命也已。篆石紀德，謂為墓誌。近古之禮也。胡可闕諸？其銘曰：

武昭之胄，立德立功。且侯且公，文穆之後。昭明有融，繼別為宗。抑之夫人，餘慶是蒙。溫良在躬，歸我秘書。體仁協衷，盛德攸同。乃訓孟子，擇予中庸。休有光風，豈命有

極豈天不傭降此鞠凶假窆何所惟柏惟桐于江之東
棘人充二武號且恫哀思無窮

監察御史李君夫人蘭陵蕭氏墓誌銘

夫人諱某字某南蘭陵人梁世宗明皇帝生南海王珣
自南海三葉至有唐太子太師某太師生中書侍郎某
以文武之勤左右帝室世祚齊國慶耀台階蓋夫人之
大伯父也父中書之弟駙馬都尉太僕卿諱衡踐修舊
德尚涼邑公主寔生夫人玄宗其外大父也宣皇其舅
也天漢派流地靈騰茂蘊為和氣鍾我淑德既笄歸于
公族李氏曰鏤：官至監察御史以茂行聞于時上奉
繼親翁羅群族夫人內貞明而外柔順至于色養義充

于輔佐仁見于周睦至乃冠昏賓祭之式組紉黼紱之
事莫不能儀刑邦教律度姻戚洎御史捐館夫人罷執
笄之事訓導三女以禮自居二十年間母儀愈光內則
愈彰知我者方紀美行貽諸彤史天不与善享年四十
八而終時建中元年九月三日也初夫人無子晝哭之
後歸于其宗仲弟御史中丞復孝愛之德聞于天下出
守三州皆從而居焉是歲中丞由潭州遷左馮翊會夫
人幼女從夫有江華之貶亦將欲沿三湘展母子之歡
途次于晉陵遭疾而沒俄兵興不克反葬馮翊次子某
以來歲某月日奉其姑之喪權窆于某鄉某原嗚呼仁
宜有壽善宜有後以夫人之賢且先代之胤与王室之

出而其事並戾豈命也歟予忝遊馮翊之門也久見命
為誌其銘曰

昔在帝祖承天命紀維皇歸妹光耀載起太師之孫魯
元之子誕受休氣實為女士共伯既歿敬姜道存訓成
內則耀動高門積德所因其禮宜蕃碩人無子天道寧
論將涉三湘奄歸九原生惟共盡有恨何言

鄭州原武縣丞崔君夫人源氏墓誌銘

夫人諱某字某河南洛陽人也昔涼武王烏孤景王儔
檀繼為傑霸據河右景王生魏太尉隴西宣王賀三生
司徒惠王恭或以文武蕃翰王室以拓拔同源因錫姓
焉夫人其後也曾祖翁皇朝尚書比部郎中祖修業涇

州刺史父光時濟陰太守夫人濟陰第幾女既笄歸于
原武丞博陵崔君某以德敏貞儉宣慈惠和輔佐君子
而成家風原武之伯父冲嘗為刑部郎中每謂夫人淑
哲之美可師表姒族洎原武疾病顧視諸子尚藐慮歸
祔不獲以屬夫人夫人嘿而省焉晝哭之後躬履草莽
成反葬之禮無違者聞者難之既免喪始游息道門
受心法于大照禪師請益之際朗然懸解大照歿又事
弘正禪師入定性離天機獨得喜怒哀樂無自入焉宴
坐之外以敬姜之風操班氏之詩禮貽訓親族閨門之
內盛烈流美禪林高妙受用不極委和歸真享年若干
大曆甲辰歲十一月十三日寢疾捐館嗣子某等泣血

衰事以來歲某月日權空于某原仲子左車紙孝而文
懼聖善之德不著後嗣遂假我為誌銘曰
烈三雄閣降茲淑哲惟夫人芳郁三母儀中外肅祇耀
聖門兮以道自先我性則常奄歸真兮孝子維嗣其哀
也至刺斯文兮

衢州司士參軍李君夫人河南獨孤氏墓誌

夫人姓獨孤氏六世祖永業北齊司徒臨川郡王自臨
川五葉至贈秘書府君諱某門風世德家謀詳矣夫人
秘書之第某女生而純孝容範淑茂成于德門歸于公
族李氏曰濤故楚州刺史仲康之子今御史大夫涵之
從兄也少有敏才故秘書府君以夫人歸之恪勤婦禮

以正家節門內之治繫柔明是賴乾元初李君參掾信
安遂終于位夫人罷助祭之事專以禮詩之學訓成諸
孤議者以魯敬姜辛憲英為比晚歲以禪自適謂般若
之經空惠之筌恃而為師去諸結縛猶違土也享年五
十三大曆十一年某月日寢疾終于常州遂權窆于建
安精舍之側明年某月日卜筮襲于吉始遷兆合祔于
洛陽某之先塋嗣子前越州士曹參軍居介南陵尉
居佐譙縣尉居敬孝廉居易等痛聖善之德不可追也
俾爾為誌其銘曰

溫三夫人貞順而慈始為婦儀終為母師仰成法寶類
脫塵機身世兩遺乘化而歸合祔伊何周原舊城哀三

令嗣孝思罔極作銘片石以誌定窆

杭州臨安縣令裴君夫人常山閻氏墓誌

夫人姓閻氏皇朝考功郎懿道之孫銀青光祿大夫尚書刑部侍郎伯璵之女河東薛氏之出前廷尉評領臨安令裴深之室也春秋若干以大曆乙卯歲五月寢疾卒于晉陵之私第來年月日窆于某原不獲吉卜未祔于皇姑禮從宜也先期臨安以夫人之德善俾予銘其墓故得而讓云夫人貞順惠和恭明孝慈自天受也樂善睦親儉而好禮承家訓也循采蘋之度以助祭祀得婦道也四教行九族和秉內則也夫人有是淳懿故自致禮至于捐館小大無間言中外無異望郁二詵一

家興仁俟絕之際請辭其太夫人又辭其姊如已而顧所生之四女曰母子之愛今也永絕夫中饋不可以無主吾已請而父娶繼室矣其來也汝謹事之無貽我神羞辭氣不惑言畢遂歿夫號母慟諸女孺墓間一哀者行路出涕存歿之事其感人深矣哀哉乃為銘曰
穠矣薜華茂蘊質兮配此良士如琴瑟兮嚴霜隕零曷其疾兮于嗟碩人歸此室兮

德州安得縣丞李君夫人梁氏墓誌

夫人安定梁氏族高祖華陽襄公諱彥先生周隋際歷土大將軍開府儀同三司使持節青冀華相等九州刺史貞惠文敏為兩朝名臣生曾祖永安成公文讚在隋

為司隸刺史司隸生皇朝龍興令冀州長史晏二生朝
散大夫堯山令澄夫人堯山之第二女惠和孝慈幼有
令儀長而溫良成而柔明年若干嫁趙郡李兼金生四
子而兼金卒夫人內持正性外示德禮且以文行忠信
貽訓諸子家道以和每言曰敬姜大家吾師也既晚歲
修釋氏法以禪誦為事視身世榮枯與夢習同因命第
四子為沙門以清淨行既而壽量極享年七十二歲在
乙卯七月乙未終于常州建安佛寺後五日窆于某原
孝子詠等銜痛泣血哀過予禮懼先夫人德善不聞將
誌幽宥以爾外族之屬也俾為斯文銘曰
伊夫人煥母德道可尊禮不忒訓令子就儒釋歿而藏

焉永無隙人欲我知視此石

朝散大夫使持節常州諸軍事守常州刺史賜

紫金魚袋獨孤公行狀

仲尼述易道于坤曰君子敬以直內義以方外詩三百
一言以蔽之曰思無邪公天生懿德外方內直氣茂才
全發為時文得大易之中詩人之正邈予其不可及已
七歲誦孝經先秘書異其聰敏問曰汝志如何句公曰
立身行道揚名于後是所尚也後博究五經舉其大畧
而不為章句學確然有可大之業知者益器之十五秘
書捐館公茹血在疚踰時而後杖由是御黨稱孝三十
餘以文章游梁宋間通人潁川陳兼長樂賈至渤海高

適見公皆色授心服約子孫之契天寶十三年應詔至
京師時玄宗以道莅天下故黃老教列于學官公以洞
曉玄經對策高第解褐拜華陰尉故相房琯方貳憲部
請公相見公因論三代之質文此六經之指歸王政之
根源憲部大駭曰非常之才也趙郡李華扶風蘇源明
並稱公為詞宗由是翰林風動名振天下及函洛寇擾
公違難于江南上元初授左金吾兵曹掌都統江淮節
度書記非其好也未幾徵拜右拾遺因上疏陳便宜及
方鎮有冒于貨賄舉直錯枉大者十餘事不行皆焚其
藁時大盜之後百度草創而太常典故尤所壞闕公為
博士祇考古道酌沿革之中凡有損益莫不悉當新平

公主之子裴放尚永清公主公實相禮初以裴僕射遵
慶主婚中詔長主後夫姜慶代焉公奏曰婚姻人道之
大使異姓主之非禮也且無以示天下臣不敢奉詔上
從之又議定謚法公謂謚者蓋迹其事業和正而褒貶
之舉一字可使賢不肖皆勸故其議呂諲盧奕知運等
謚皆參用典禮約夫子之旨其事覈其文高學者傳示
以為式時有工議謂景皇帝未升尊位不宜為太祖詔
下百僚公按禮經以為王者禘其祖之所自出而以其
祖配之故三代皆以受命始封君配昊天上帝唯漢氏
崛起豐沛豐公太公皆無位無功德不可為祖宗故以
高帝為太祖若景帝肇啟王業建封于唐高祖因之遂

以有天下之號天所命也宜百代不遷因其故事條奏
從之于是郊廟之禮遂定踰月拜公尚書禮部員外郎
遷吏部每歲以書判試多士而朝列有以文學稱者必
叅校辯論定其甲乙丙科至是公分其任求為郡守以
行其道除濠州刺史公下車以淮士輕剽承兵革之後
率多不法長吏不能制遂先董之以威格之以政然後
用宣第寬厚漸漬其俗三年而監境大穰優詔褒美移
拜舒州刺史又以行閩壘書就加朝散大夫檢校司封
郎中賜金印紫綬其明年吳楚大旱饑夫聚于荏蒲者
十八九唯舒安阜近者悅遠者來犬牙之境草竄不食
上聞之詔曰斷獄歲減流庸日歸以人俗之豐給當淮

湖之灾旱爾守之力也擢拜常州刺史本州都團練使
常州為江左大郡兵食之所資財賦之所出公家之所
給歲以万計公削其煩苛均其衆寡物有制事有倫刑
罰罕用頗類自息公又謂安人之道清而靜之則定為
而察之則擾故寬以居之仁以行之一變而百姓不知
其理又一變知其理而不知理之所由比及三年吏不
忍欺路不舉遺年穀屢熟灾害不作甲辰歲冬十月二
十日甘露降于庭樹二十七日乃止嗚呼公庇斯人二
方仰公彼天不惠降此大厲為郡之四載大曆十二年
四月壬寅晦暴疾薨于位行路慟哭罷市者相吊踰月
又吁嗟之聲相聞自僚屬相吏下逮鄉老里尹皆率以

脩齋祭及葬之日齋衰送喪者數千人惟公體黃老之
清淨包大雅之明哲尊賢容衆而交不諂瀆本仁祖義
而文以禮樂乃至溫良能斷應用不滯達識足以表微
厚德足以載物善而不伐光而不耀內不机巧外無滯
磷隕然中正豁若虛受其長人也先教愛而後法禁不
遷怒以臨下故威而不猛不私己以欺人故易而無倫
其茂學博文不讀非聖之書非法之言不出諸口非設
教垂訓之事不行于文字而達言發辭若山嶽之峻極
江海之波瀾故天下謂之文伯有集二十卷行于代若
藝文之士遭公祭揚盛名比肩于朝廷則有故中書舍
人吳郡朱巨川中書舍人渤海高參今尚書左丞天水

趙憬職方員外郎知制誥博陵崔元翰考功員外郎顯
川陳京禮部員外郎北海唐次蘇州刺史高陽齊抗其
章三者也其睦親与善自內姪及朋友所知之家振窮
分灾恤孤哀喪頒祿歸贈必加于常人一等故啟手足
之日室無餘財唯四布然後乃斂議者于是謂公有文
子之清子產之仁史魚之直平仲之与人曾生之行義
文翁之政事叔子之遺愛而不躋巖廊不享期頤闕致
君論道之美以遺史冊故凡百以為痛狂昔孔文子以
敏而好學為文公叔祭以恤衛國凶飢為惠矧公功存
于人言垂于代有文有質不忝前烈者歛易名之禮請
從令典謹狀

尚書考功伏以褒德尚賢設教之崇軌加謚易名飾終
之令典謹按故朝散大夫使持節常州諸軍事守常州
刺史賜紫金魚袋獨孤某蘊黃裳之服協中庸之德正
詞復禮施化為邦清風存乎省寺遺愛結于黎庶具美
之道何以尚茲定岁既安音徽日遠請追公叔之謚式
播臧孫之烈謹上

祭獨孤常州文

大曆十二年歲次丁巳五月朔日門生安定梁肅謹以
清酌庶羞之奠敬祭于故常州刺史河南獨孤公之靈
嗚呼間氣炳靈降生哲人何辜今人而喪斯文豈上天
不仁道之將廢奚盛德之淳懿忽中年而下世蹈得仁

之礼顏子不幸負王佐之才賈生屏外其明尚晦其用
未大藏舟既移梁木斯壞嗚呼哀哉追惟哲人應運而
生行在五常志在六經博厚温良直方而明天縱多才
蔚為時英孔門四科洪範三德惣于公躬率履不忒頌
聲既微鄭衛亦塞或游或僻時万時億公當其時載振
其維憲章典謨為學者元胞文哉郁子文實在茲伊昔
策名東堂作尉西華銘仙掌与函谷馳休聲于天下逮
予拾遺君前考禮太常猷可之詞直而含章建言削藁
故海内莫揚旋議廟祧乃正謚法享帝之禮終焉允洽
名正言順事深體合垂後可大賢人之業起草剖符出
臨濠舒二邦之民僕我而蘇豈弟之化風行露濡蘭陵

之郊人散政弛清淨之德下車則治比迹印父視人如
子闔境熙怡有禮知耻朝思黃霸人仰安石霄漢在目
岩廊咫尺不留不處坐而遐舉不慮不圖忽焉傾殂遐
邇震駭士民號呼罷市輟春相弔路隅嗚呼哀哉顧惟
小子慕學文史公初來思拜遇梅里如舊相識綢繆慰
止更居恤貧四稔于此嘗謂肅曰為學在勤為文在經
勤則能深經則可行吾斯願言勉子有成又曰文章可
以假道：德可以長保華而不實君子所醜敬服斯言
敢忘永久若乃室中函丈之席林下清觴之宴陪李膺
之泛洛從叔子之登峴亟承國士之遇又忝公車之薦
奉明誠以周旋盡深衷于眷眄惟吉凶之倚伏若糾紛

之相纏追子服之占日應康成之暮年不云坐奠不暇
撤懸秦醫靡救丘禱徒然瞬息之間音容莫傳痛心驚
骨不可問天嗚呼哀哉平居所好修竹芳草暇日之娛
左琴右書微言雅典斷而不續高齋已空蘭蕙猶馥門
人行慟稚子抱哭語言在耳悽慘滿目嗚呼哀哉覽遺
編以流淚痛明德以無還撫諸孤之尚藐庶盛烈之斯
存御路千里歸期九原寄觴豈以寫心見平生之厚恩
嗚呼哀哉

祭李祭酒文

年月日守右補闕安定梁肅謹以清酌嘉蔬之奠敬祭
于故國子監祭酒贈戶部尚書李公之靈惟公之德柔

嘉惟則敬義且直惟公之才文武是該不矯不回剖符
七郡風行雨潤有禮有訓連撫二藩如江如漢之屏之
翰數聞帝庭爰因陟明乃拜司成是親是行時則不幸
遭茲大病薨于道路孰識天命嗚呼哀哉追想曩昔大
曆之中獲見君子吳江之東靡適不隨無會不同于山
于水于野于寺提攜燕喜荏苒半紀公鎮南方奄征江
黃車離兩鄉道阻且長惠而好我簡牘相望于囊于箱
厚意是將淑人君子懷允不忘謬繫纓組列于朝序望
公之來寤寐斯佇方期款遇爰笑爰語豈意長往終焉
莫睹寢門一慟意折神沮誰云少別便是今古嗚呼哀
哉古人所稱曰仁與誼君子之道在功與事邦憲之雄

元侯之貴存有盛美歿有遺懿所恨伊何壽猶未至所
悲伊何人失其庇嗚呼哀哉九原連連乃在三原日月
有時庇庇攸安某近職是拘執緋無緣寄陳薄酌有慟
何言嗚呼哀哉尚饗

祭李處州文

年月日淮南節度掌書記殿中侍御史內供奉梁肅謹
以清酌庶羞之奠敬祭于故處州刺史隴西李公之靈
和氣訢合乃生靈芝乃流醴泉降于人倫是為俊賢猗
欵李公有德有言煌煌九葩澹澹一源弱歲含章典教
弘文聞喜太丘遺愛斯存于越于宣先在西藩名高蘭
臺風動輶軒濯纓歸朝再踐廊官鴻鵠入冥白雲在天

或謂盛才宜管絃綸潤色謨訓以垂後昆官無中人吾
道不興苗滯周南退守荅陵剖符于處美化斯弘雲油
露濡山靜江澄解印歸來考槃是卜龍沙游衍餘干耕
鑿与道為徒以農代祿河洛織緯桓譚不學草玄法言
楊雄有作志一窮通身安淡薄遇酒便醉工文且博脫
遺形骸奄就冥漠士友殄悴翰林凋落嚶鳴既合久要
乃申四海兄弟如公幾人公去南州角巾衡門予集艱
棘哀惻若辛眷恤何深弔問慙慙江湖渺然書札相因
方期歲暮以德為鄰今也則亡吾誰与親鄧攸無嗣柔
扈反真天道茫昧誰云与仁嗚呼哀哉我圖其室得公
之出相維茂族予以納吉眷彼三星成之不日魂而不

亡知此親昵嗚呼哀哉季奉裳帷九原是歸葬于洛表
路出淮夷平生歡愛一慟申悲已矣夫子忽予何之肯
酒盈尊幽明此辭尚饗

為獨孤常州祭福建李大夫文

年月日具官某謹以清酌之奠致祭于故福建都團練
使李公之靈嗚呼宗祏儲祉元紘降氣炳靈于公才全
德克寬仁愿公高朗昭融文學政事儀刑王風帝謂叔
父闡寶下國出作侯伯導之以德內撫羸人外攘劇賊
文武為憲柔嘉是則我教用宣我民既安佇登岩廊為
國羽翰彼高者天胡莫祐賢人之云亡曾不永年嗚呼
哀哉其往忝諫臣在公下列周旋獻納以日繼月海運

方遠搏風未歇不慮不圖音徽已沫暮律嚴苦降霜肅
殺臨岐一觴以抒慘怛嗚呼哀哉

為人祭柳侍御史文

年月日具官某謹以清酌庶羞之奠敬祭于故侍御史
柳公之靈惟公以孝友承家以直方從政以溫厚行己
以敬讓與人作椽大邦有親信之稱典司通邑著循吏
之名冠惠文佐廉問輜軒所指吏肅風變列郡攸揖斯
人以寧方將荷餘慶而介景福播令名而延大塋天不
與善命也有終士林怛駭親友歎歎嗚呼哀哉某等獲
與公遊聯職戎司適云少別俄見凶歸予以設奠出守
郊岐魂也何之幽明此辭嗚呼哀哉

為獨孤郎中祭皇甫大夫文

年月日具官某謹以清酌之奠致祭于故浙西東觀察
使皇甫公之靈古人有言智仁及勇是謂達德大夫蹈
之以衛王國乃昔天步未夷六師徂征嘗扞牧圉戡彼
醜虜勇也及夫官豎擁兵窺伺樞密公沉謀內斷輔德
不穢智也分陝收越統戎鎮俗承其風者莫不寧息仁
也議者謂公方為國翰垣為人父母宜錫難老荷茲介
福命之倚伏曾是不淑豈夫天仁奪人所欲大旆長駁
東征不復如彼魯侯往歌來哭嗚呼哀哉某頃與公相
遇于斯今也言歸投吊于斯泣一方舟旋載裳帷晏
言笑今成涕洟道路遠而音塵絕而旨酒一觴惟靈享

思嗚呼哀哉

為杜尚書祭侍御史文

惟公天挺貞淳爾恭溫仁以禮立志以道藩身惟靜惟
勤克儉克勤正直自立邦家必聞久侍禁闈嘉名益振
上曰爾才監戎于閩身許九重禮達三軍中協睦罔
或不親朱紱煌煌映于銀章方期奏報歸侍天王外廼
炎瘴內纏膏肓不永斯年今也則亡浮江涉淮遠窆舊
疆丹旄翩言過維揚某早接公遊仍弔公喪追懷夙
昔感涕沾裳秋日淒淒浮雲無光敬陳薄奠哀塞中腸
嗚呼哀哉伏惟尚饗

為常州獨孤使君祭李員外文

大曆五年九月日朝散大夫守常州刺史賜紫金魚袋
獨孤某謹以清酌之奠祭于故尚書吏部郎趙郡李避
叔三兄之靈嗚呼疇昔之年接兄討論倚伏之數或尋
其源嘗謂仁人百祿滋蕃如何于兄斯莫存焉嗚呼哀
哉惟兄孝友仁恕高明寬裕何德之茂何才之富粹氣
積中暢于四支發為斯文郁有輝自五百年風雅陵
遲假手于兄鬱為宗師乃登憲闈直以舉之乃列諫臣
闕則補之玄宗季年戎狄內侮兄方就養却在豺虎氛
霧濛濛薄汚我躬雷雨作解遠身于東帝曰孝哉可移
于忠名居右掖亦踐南宮立明為恥玄晏方病清漳閑
卧樂道推命哀于大賢不享大年人之不幸天亦何言

在昔賈生見惡絳灌王佐之用不展于漢戎之方行遭
世紛亂時運屯塞古今一貫嗚呼哀哉某以蒙蔽夙承
眷惠義均伯仲合若符契博約予文章之事優游予性
命之際謂得攜手相期卒歲天其喪予兄則先逝嗚呼
哀哉曩自朝列出持使節十年離別一旦存沒吳楚迢
遞江山阻越不及歸贈仍乖執紼寢門一哀魂斷心絕
恭承嘉命來牧于常總帳斯在哀何可忘鞠然二孤訴
彼穹蒼孰謂遐叔与天茫茫魂兮歸兮臨此一觴嗚呼
哀哉

為雷使君祭孟尚書文

年月日具官某謹以謹酌之奠敬祭于故福建觀察使

兵部尚書贈右僕射孟公之靈嗚呼上天不仁公薨于
位岳鎮傾圯士林殄瘁追論茂德忠敏恭懿仰惟盛才
文學政事昔在天寶濫觴登朝爰自中興鴻飛乃高入
覲京師出司藩條便蕃中外聞望光昭我后統天式張
百揆公居右轄實總聯事推轂西郊兵符攸寄俄被禫
冕為王近侍無諸舊城人竅地僻詔曰爾諧出作侯伯
敷求民瘼宣布王澤嶺表海隅夷風載革天下謂公耆
德盛名宜登岩廊為國老更方期三壽忽夢兩楹天寶
不遺人誰仰成爰因七閩歸于九京當時大旆今也明
旌嗚呼哀哉某自官學則趨明哲邦憲府庭再恭下列
周旋惠好以日繼月不慮不圖有存有沒皇恩軫悼寵

光昭晰和人怨思祖奠凄噎談笑如昨音徽永沫臨歧
一觴以抒慘怛嗚呼哀哉尚饗

為杜東都祭竇廬州文

年月日具官某謹以清酌之奠祭于故廬州刺史扶風
竇公之靈嗚呼惟天難諶惟命罕言倚伏同域吉凶一
門公之茂行廉直而溫公之達才卓爾不羣保身以正
為政以仁宜錫難老以庇斯民如何降凶奄忽反真伊
昔登朝厥猷則茂柱下執法南宮草奏赤縣浩穰四方
輻輳惟公下車善政俄報廬江曠守人或未康惠君既
來美化洋洋治而有禮俾人知方予忝廩問實知循良
將以工聞冀殊寵章命之不淑曾是隕喪嗚呼哀哉追

想曩昔接公周旋惠好斯存如蘭如荃問者睽濶東西
累年會運于茲談笑依然別未數旬遽歸九泉孰為福
善殲此仁賢官守所羈祖奠無緣寄誠薄酌有恨何言
嗚呼哀哉尚饗

為杜尚書祭歿將文

年月日某使某謹以清酌之奠敬祭于壽州鎮遏十將
何鄭江某官三士之靈嗚呼勤身奉主之謂忠臨敵致
果之謂勇以死成名之謂節惟此三士具茲三美昨者
對境不靜寇竊斯興各領軍行以當扞守山谷積阻矢
石相陵謀無所用志必有死遂使英氣挫于小醜雄心
屈于短兵人之云亡斯害也已嗚呼哀哉我居藩鎮不

能守。在。四。鄰。爾。有。忠。勲。遂。乃。沒。于。一。戰。且。憤。且。歎。激。于。中。賜。知。以。今。辰。旋。歸。壽。陽。爰。遣。奠。酌。用。申。悲。涼。加。爾。贈。賻。卹。爾。孤。孀。魂。而。有。知。予。不。忘。人。誰。不。終。所。貴。名。揚。已。矣。三。士。俱。為。國。殤。嗚。呼。哀。哉。尚。饗。





